

तुबारि

पं ग वा डि मा सि क प त्रि का

तुबारि संपादकीय टीम

◆सोब पांगेइ मेहणु जे तुबारि संपादकीय टीम कनारा जुकारू मुबारक।

◆इस तुबारि मासिक पत्रिका समाचार पत्र एक्ट अन्तर रिजिस्ट्रि नेई भो। सिर्फ पांगि घाटि अन्तर पढ़ जे इ पत्रिका शुरु किओ सि।

◆तुबारि यक अवाणिज्यिक पत्रिका भो।

◆तुबारि पत्रिका कोइ मेहणु, जनजाति, त संस्कृति जे गलित कड़ेण जे नेई छपाण लगो। अगर कोइ ई सोचता बि त अस जिम्मेबार नेई।

◆छपाणे पहले सोभ आर्टिकल दुई टाई पांगेइ मेहणु हरालो असे। इ त खुलि बोक असि कि पहिल बार पांगवाडि लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे हारे संस्करण पुठ ठीक करणे कोशिश कते।

◆आर्टिकल्स ना मिले, या घाटि मेहणु के मदद ना मिले त तुबारि पत्रिका कदि बि बंद भुइ सक्ति।

◆कोइ चिज छपां सि या नेई छपां जे तुबारि संपादकीय टीम पुरा अधिकार असा।

◆अस सोभि पांगि मेहणु जे हात जोइ कई निवेदन कते कि, तुस बि कोइ अछा अर्टिकल, पुराणि या नौइ कथा, कहावत, कविता, त नौवे घीत (पांगवाडि अन्तर) लिख कइ छपां जे हेंन्दे दिए।

◆अस किलाइ केन्द्रीय पुस्तकालय, त बजार ठेके भैइ हरिरामे दुकान अन्तर तुबारि ड्रॉप बॉक्स पुठ बि अपु सजाव ओर अर्टिकल्स रखुं जे सुविधा किओ असि।

बोउए प्यार

यक गाँ, यक मेहणु दुइ कुआ थिये। तेनि बछ केंठा कुआ अपु बोउ जे बोता, “तैं धन अन्तर जे में बांट असी तेस मेन्ने दिए । तोऊं तेन मेहणु अपु सोब बग, धन सम्पति त रुपेइ अपु दुइ गभुर बुछ बांटी। सुआ दिन नेओथ भो, से कुआ अपु बग बेछ-बूछ कइ सोब धन सम्पति किठेरा त यक दुर देश नशी गा। तेनी तठि तास खेलण, गंजा, अराख पीण त होरे गंदे काम कइ कइ अपु सोब रुपेइ मुकाई छाड़े। जपल तसे रुपेयि ठटि मखि गे, तखेई तठि यक बड़ा अकाल पिया। क्यौं कि तेन अपु सोभ रुपेइ इरू खर्चा कीओ थिआ, त से खाण जे कोई बि मेहणु कुछ न देन्तेथ। जपल दुके सुआ रोज भोई गे त तस घेरा एण लगे। त तेनि सोचु ‘इरू बिश कइ कोई फइदा नेई, कुछ न कुछ त जरूर करुं लौतु। ना त अउं इठ दुका मरी घेन्ता। पता, से तेस देश यक सहुंकारे गी नौखरि करुं जे गा। तेनि सहुंकारे से पुहाल बणाई छाड़ा त तस ढाडुइ जेई लंघा। दुके तस सुआ रोज भोई गो थिए त तेनि कोये मन, जे अइदा गोउर खान्ते तसे बोलि अपु पेट भरता। पता जपल से अपुं चेता पुठ एइ गा त से अपफ जे बोलुण लगा कि, में बोउए नौखरि रज्जि खई के बि कति रौंठि इरू बचति त अउं इठ दुके मरण लगो सा। अभेई अउं अपु बोउ केई घेन्ता त तस जे बोता“ बोउआ, मेई परमेश्वरे त तैं अगर पाप किओ सा। त अब अउं तैं कुआ बोलुणे लायक नेई रिहो। त मोउ तु अपु नौखरे ईं रख। तौं से खड़िआ त अपुं बोउ केई घेई गा। से दुरे इ थिया, तेसे बोउ तेस हेर कइ पेछाणि गा । तेस अपुं कोये हाल हेर कइ तस पुठ दा अई गई। से दौइ दी कइ गा त अपुं कुआ जुए गड़े मिआ त फोकइया। त से कुआ अपु बोउ जे बोता, “बोउआ, मेई परमेश्वरे त तैं अगर पाप किओ सा। त अभेई अउं तैं कुआ बोलुणे लायक नेई रिहो। पर तसे बोउ नौखर जे बोता “झट पट यक अब्बल ईं झीणे आण कइ एस डबाण दे त अन्गुलि जुए यक सुने अंगुठि त खुरि जुए बुटे लाण दे। तौं घेई कइ यक जबर ईं बकरा कटा । अस धाम कते त जाठ लान्ते। क्यौं कि में यक कुआ मारि गो थिआ, से फिर जी गा। से गाडि गो थिआ त दुबारि मी गा।” तौं से सोभ मीं कई खुशी जुए जाठ लाण लगे।

कर्शण बिमारी बारे सूचना

गेउर जिमदार के धन भो। से असि सोब जे दुध, देई, छा त घीउ देन्ते। हें ट्यारे गेउर कुछ बिमार भोई घेएल त असी सुआ दुखि भुन्ते। कर्शण बिमार यक ई बिमारी सि जेसे बलि ठटि जिमदार परशाण भुन्ते। इ बिमारी इन्हि महेनि पांगेई अन्तर सुआ बदि घेन्ति त एसे बलि सुआ गोडे बि मर घेन्ते । त तुबारि टीम सोचु कि कर्शण बिमारी बारे कुछ सूचना दिउं।

कर्शण बिमारी जे चिकित्सा विज्ञान अन्तर *बॅसिल्लरि हिमोग्लोबिनयुरिया (Bacillary hemoglobinuria)* त अंग्रेजि अंतर *रेड वाटर डिसिज “Red Water Disease”* बोते । इसे *रेड वाटर डिसिज* इस लिए बोते क्यौं कि से गेउठ जुओइ लेउ एई घेन्तु । कर्शण बिमारी “*क्लोस्ट्रिडुइम हिमोलइटिकम*” (*Clostridium hemolyticum*) नाओएँ निके निके लोलुड जुओइ एइ घेन्ते। ऐ बिमारि यक साल केआं खड़िआ उमरे गौडे, चूर त डेडुड जे लग घेन्ति। (पशु पालन विभाग, पंजाब कृषि विश्व विद्यालय, लुधियाना, भारत) १९९८ अन्तर लुदियाना ११० डेडुड जुओइ परिक्षण कइ के पता ६० डेडुड जुओइ इस बिमारि असि, बोलो थिउ। **कर्शण बिमारि किं एन्ति:-** कर्शण बिमारी गेउरे गेउन्ठ, मल, मासुं त हलोटे

जुओइ जन, पोण, घासे बइ बढिआ गेउर बि बिमार भोई घेन्ते। कर्शण बिमारी लोलुडु ऑणुण (लोलुड त ऑणुण टी जे ना केतु) जन, पोण, घास अन्तर सुआ साल जीते रेंहते। एसे मतलब, कर्शण बिमारी गौडे मल जपल बग छते, तठि पुरा घास लोलुडे ऑणुणु बइ भरी घेन्ते। पता जपल बढिआ गेउर से घास खांते त कर्शण बिमारी एणे सम्भावना भोई घेन्ति। लोलुड ऑणुणु, घास त पोण जुओए गेउरु पेट अन्तर घेइ कइ लेहु जोइ मी कयि काजा अन्तर विश घेन्तु। जपल ओक्सिजन कम मेति तोउँ से ऑणुण, लोलुड भोइ कइ सुआ भोइ घेन्ते। इ कर्शण बिमारी लोलुड जपल काजा त लाल लेहु कोशिका खायि छाँति त गेउंटे रंग लाल भुइ घेन्ता। जतु लेहु कोशिका कम भुन्तु तत कम ओक्सिजन लेहु मेति। तपल लोलुड सुआ भोइ कइ गौडे मार छति। **कर्शण बिमारी लक्षण:-** कर्शण बिमारी ज्यादातर एक साले कियाँ खडिया गौडे जे एन्ति। बिमारी पुरु भुणे टेंम गौडा, घास सुसुर न खांता, दमाँ लगता, इनम्बयि, ओम्बयि घेन्जे मरजि न कति, बिमेरी बोलि दुखि मुँह केतु। कर्शण बिमारी सुआ भोइ कइ पता लाल रंगे गेउंठ एन्तु। **ईलाज:-** बिमारी पुरु भुणे पेह्ले पेनसिलिन दुवाई थोडा मदथ कइ सकति। बिमार सुआ भोइ घयेल त गौडे मर घेन्ते। कर्शण बिमार जुओइ कोइ बढिया दुवाई नेई। एसे इलाज सिर्फ टिका असा। जेठ ए बिमारी असि तेठि “क्लोस्ट्रिडुइम हिमोलइटिकम” टिके बइ सोब गोउडे के कुछ साल तकर ईलाज करुं एन्ता त सोभ गेउर बच घेन्ते। दो कि बोक इ असि कि कर्शण बिमारी टिका भारत देश अन्तर मिलणे कोई जानकारी नेयि। इ टिका अमेरिका, केनडा त पश्चिमि देश अन्तर मेते। **कर्शण बिमारी टिका किं मेई सक्ति?** पेह्ले कर्शण बिमारी जुओइ मरो कुछ गेउरु के काजा परिक्षण करुं एन्ता। (भारतीय पशुपालन खोज संस्थान, पालमपुर, इस परिक्षा कर सक्ति) तढे पता, तस रिपोर्ट जुओइ हिमाचल राज्य सरकार कर्शण बिमारी टिका जुगाड कइ सक्ति। तोउँ, से टिका पुरे पांगेई गेउरु जे (बिमार त बढिए गेउर) कुछ साल तकर दें एन्ता। ए एक रोजे कम न भिन्त, पर अस सोब इस बारे कोशिश करीं एन्ति। से बोते न जी, “ईलाज केआं त परहेज बढिआ भुन्ता।

कर्शण बिमारी परहेज:- 1. कर्शणे बिमार गेउरु बेहर ना छाडे। जपल तकर गेउरु सुसुर न भोल या मर न घेएल तौं तकर तस अन्तरे घास, पोण खिलाण दे। कयों कि कर्शण बिमारी गेउर बेहर घुमणे टेम मुटते त मल छते। तपल तठि घास त पोण जुओइ कर्शण बिमारी लोलुडु लग घेन्ते। तढे पता बढिया गेउर तस घास खातें या पोण पिते त कर्शण बिमारी एणे सम्भावना भुन्ति। 2. कर्शण बिमारी जुओइ जे गेउर मरो सा तस अढाइ हथ खोपर अन्तर पत छां। त से जगा सुआ सालि तकर न कडिं दें। कर्शण बिमारी बोलि मरो गेउर कदि बेहर न फटाण। कयों कि तसे मासुं त हलोटे जुओइ कर्शण बिमारी लोलुड पोण जुओइ मी कयि तठिएंकण घास खराब कइ सक्ति।

कर्शण बिमारी गौडे मल त गेउंठ अलग बाल्टि बइ भीं कीढ कइ अढाइ हथ खोपर अन्तर पत छां। से मल त बढिआ गेउर के मल कदि न मिआं त बग या बुटे जे ना छां। कयों कि मल अन्तर कर्शण बिमारी लोलुड पुरा बग त चारा जुओइ लग घेन्तु। तढिआ पता से घास खाई कइ बढिआ गेउर बि इ बिमारी एइ घेति। Cattle Producer's Library, Animal Health Section; David P. Olson, Professor and Pathologist, University of Idaho

जनवरि मेहने कुछ खास खबर

- ◆ करमापे मठ अन्तर मेइये सथ करोड़ रुपेई। जेन्हि अन्तर चोबि देशी के नोट असे। सपाई छानबिन करुं लगो से।
- ◆ देश बाठ वां २६ जनवरि (गणतंत्रता दिवस) धुम धाम जुओइ मना। राष्ट्रपति श्रीमति प्रतिभा सिंह पाटिल मेहगाई त कालाधन पठ चिन्ता जतो सि।
- ◆ जनवरि मेहेन अन्तर हिमाचले पुठि कश्त्र अन्तर डंग शिआ। त जन जीवन अस्त व्यस्त भुआ।

ADVERTISEMENT/ BEST WISHES CORNER



For Advertisement/ Best wishes
please contact

9418429574; 9418431531; 9418721336; 9418411199



For Advertisement/ Best wishes
please contact

9418429574; 9418431531; 9418721336; 9418411199